

# Kerweredd 2012



Sonntag, 01.07.2012

Vorgetragen von: Carolin Westrich

Ihr liewe Leid un Kerwegäschd,  
herzlich Willkommen zu unserm diesjähriche Kerwefeschd!  
Was war dann los, ihr warn jo so still,  
kanns vielleicht sinn, dass kenner was iwwer sich here will?  
Doch ihr Leid ich kanns euch san,  
so e mancher glabt heit schon noch dran.

Die Aue sin groß, die Ohre uff,  
E jeder is gespannt was noch so steht uff denne Blätter druff.

Ich wünsch eich viel Spaß, ihr werre ne hann,  
wenn ich eich verzehl, was so e Nerremohrer alles kann.

## **MUSIK**

### **STRAUßBUWE**

Politisch bin ich uffem neischde Stande,  
was zu de Verkehrspolitik, awwer nur so am Rande.

Ich weiß jo ned fer wenne das macht e Sinn,  
das mer haut so viel Steuer in de Benzinpreis enin.

Lossen doch deshalb es Geld uf de Banke,  
odder nemmens fers Bier, mit dem ner eich selbsch betanke!

### **STRAUßBUWE**

Das mitm Bier is a so e Sach,  
ich warn eich mol lieber, sonsch hanner de Krach.

Sie sinn unnerwegs im Namen des Recht,  
in unserer Hauptstroß gebbts rasante Verfolgunge jetzt echt!

Mer fühlt sich schon sicher Dehäm in seim Hof,  
awwer die Gesetzeshüter hann die Aue ned voll mit Schlof.

Deshalb sollt mer sich vorher mache e paar Gedanke,  
bervor mer sich dud mit Bier voll betanke.

Doch was e Glick in de heutische Zeit,  
anstatt es Auto macht mer einfach es E-Rad zum Stromtanke bereit.

Mer brauch ned sei Lappe uff so me Rad,  
un fer die Umwelt isses a kä schlechti Tat.

## **MUSIK**

### **STRAUßBUWE**

Wenn mer doch grad beim Fahre sinn,  
bring ich doch gleich no e Sach rinn.

Bei Rot soll mer halle, das lernt mer als Kind,  
E mancher fahrt trotzdem noch driwwer geschwind!

Das bassiert ned grad jedem, un is kä Witz,  
so e mancher LKW fahrt schnell wie de Blitz.

Es is jo ned grad e klänes Gefährts,  
und die Ordnungshüter hann sich halt richtig drum geschehrt.

Privat wär das jo ned mol so schlimm wie im Job,  
wenn mer fer vier Woche de Lappe ned hott.

Mer kanns jo umgehe, frot de Chef no Rat,  
der losst ned locker un bestroft die Tat.

So isses passiert de Führerschein fert,  
was jetzt bloß aus dem Beruf noch werd?

Gar kä Problem de Chef hats gut mem gemennt,  
un schickt seine Mann fer vier Woche in Urlaub,  
dass er kä roti Ampel mehr verpennt.

In heutige Zeite, mit dem viele technische Kram,  
wärs doch möglich zu baue in de LKW e „rot-Ampel Alarm“.

Die Grantie wär gebb, dass a Jeder es hert un sieht  
un die Gefahr wär weg, dass so e mancher bei ner rote Ampel  
trotzdem noch mol es Gas anzieht.

## **MUSIK**

### **STRAUßBUWE**

E Weihnachtsmarkt in jedem Ort,  
von Jedem gebts e liebes Wort.

Die Chefs lade em zum Esse in,  
bis nix mehr passt in de Ma enin.

So wars a in de Stadt vom Kreis,  
im Gusswerk, wie e mancher weiß.

Im Zug e Plätzje reserviert,  
do kanns Bier lafe, unscheniert.

Der Mann war lang im Feierwahn,  
do nemmt mer schon mol die letscht Bahn.

Das war jo alles gud un reschd,  
hätt er nur ned geschlof so fesched.

In seine Träum noch fesched un tief,  
als enner plötzlich „Altenglan“ rief!

Ja das war dann e großer Schreck,  
von Niedermohr schon soweit weg!

„Wie soll ichs meiner Frau nur san,  
ich komm ned Häm, es geht kä Bahn!“

Ach was das is doch ned so schlimm,  
mir hann grad 1 Uhr, do wird se noch ned schlofe sin.

Tja falsch gedenkt mei guder Kneschd,  
die Frau sie schloft schon tief und fesched.

So Bier macht müd, wars dir ned bekannt?  
Jetzt musche halt lafe in de Nacht durchs Kusler Land!

Kä nix, kä nimmand uff de Stroß,  
am Fuß do quellt schon die ersched Bloß.

„Ei samol darf dann sowas sin,  
was schlof ich in dem Zug a in?“

No vier Stunn laafe durch die Nacht,  
kommt mer Häm un freut sich, wenn mer die Aue zu macht.

„Ei sa mol was is dann mit dir los?  
Wo warschen die Nacht iwwer bloß?“

Ohne sich e Kopp se mache,  
musst se iwwer sei Geschichd nur lache!

Ach du Gott no dere Sach,  
iss er worr 3 Da ned wach.

Fer dich noch e schönes Lied,  
mit 50 werdd mer schneller mied!

**MUSIK**

**STRAUßBUWE**

Das is sowas heit se Dachs mit denne Berufe,  
a unser Gemeinde war kräftig am Suche!

2012, e neii Zeit,  
de neue Gemeindearbeiter stand schon in de Startlöcher bereit.

Er is jung, klug un a richtig fit,  
was war gesucht bringt der alles mit!

Wenn die Gemeinde mol is Not,  
kä Probläm, es Gemeindelaschdersche fährt er wie e  
Formel-1 Pilot.

Sollt es mol brenne – a das is kä Probläm,  
weil schließlich is er a in unsrer Feuerwehr wie Dehäm!

Er hat wirklich nur unser Gemeindewohl im Sinn,  
und baut uns deshalb mit seim Bruder e Schwimmbad fer Nerremohr  
in sei Garde enin.

Sollt aber doch mol was sinn,  
dass de der ned de Kopp zerbecht,  
fragsch deine Vorgänger, der weiß es echt!

## **STRAUßBUWE**

Mit unsre Bäum in Nerremohr,  
rauft sich e mancher schon mol sei Hoor!

Die Kerze fer Weihnachte am Gemeindetannebam lange ned ganz,  
abber vielleicht organisiert unser neuer Gemeindearbeiter a mol paar  
mehr, fer de Glanz!

Ja ihr Leid, jetzt weht e neier Wind in unserm Dorf,  
was seit Ewigkeite war, werdd einfach umgeworf.

Die Waldstroß ohne Bäum, die wirkt richtisch kahl,  
awwer wennse kaputt sin, hatt mer halt mol kä anneri Wahl.

Da die Stroß jetzt nimmi umgeb is mit Wald,  
griert se vielleicht e neier Name bald?

Vielleicht macht mer einfach e Abstimmung draus  
un werrft e paar Zettel in jedes Haus.

So e fixi Idee fer e neier Name hat e mancher kluger Kopp,  
dann werdd unser Dorf a wieder em Aussiehe entsprechend top!

Fer die Eröffnung mache mer e Stroßefeschd draus  
un die Musik sucht schon mol es bassende Liedsche raus.

## **MUSIK**

## **STRAUßBUWE**

De Grünabfallplatz unsrer Gemeinde is bekannt,  
un seit neischdem a besetztes Land.

E Mitarbeiter steht em beiseit mit Rat un Tat,  
wenn mer ned grad ersch no vier Stunn ufschlat.

Do isser aus Gesetzesgründe nämlich nimmi vor Ort,  
weil es is jo kä Kloheisje dort.

Herr Bürgermeister, denke se doch zurück an manch alti Zeit,  
wie wärs mit me Plumpsklo an de Grünabfallplatz Seit?

Dann könnt er dort sitze uff seim Campingstuhl, dem weiße,  
un fer die Leut wärs möglich a no vier Stunn dort hin zu reise.

Es is e Bereicherung fer unser Land,  
dass der Grünabfallplatz is in feschder Hand.

Ich sags wies iss, uff pälzische Weiße....  
Mache dem Mann e Klo dert hin,  
alles annere is.....(kurze Pause).....ned schä!

## MUSIK

## STRAUßBUWE

Ah Tiere derfe heut ned fehle,  
so e manches hott sich doch se quäle!

Ei so Katze sinn doch fer ihr Eigenarte bekannt,  
aber anscheinend weiß das ned jeder in unserm Land.

Sie sinn jo schon recht lieb un nett,  
wenn mer ned grad die Brotschneidemaschin am Lafe hätt.

Die Katz is durchgedreht un ab enaus,  
sie konnt nimmi bleibe in dem Haus.

All warn weg, e Jeder war schaffe,  
„Ei was dun dann die Leid in unserm Hof erum gaffe?“

Sad noch die Tochter -allä Zuhaus,  
un is dann a mol gugge vors Haus.

„Ach du Schreck, das kanns doch ned sinn,  
jetzt hockt unser Katz im höchste Stockwerk vom Nachbar seine  
Tanne drin!“

So Katze komme allä nuff un a werre von allä runner,  
wennse nur han werre bissje hunger.

No dem Gedanke warn vier Stunn rum,  
awwer die Katz hat sich am selbe Ort immer noch befunnt!

„Die hockt jo immer noch dodruf,  
jetzt muss ich se hole, un kletter dann halt selbsch mol do nuf!“

„Zum Glick“, denkt die Oma, es is doch zu schä,  
ällä fers Terrassedach zu erreiche wars zu klä!

Dann is komm de Nachbar e recht großer Mann,  
fer zu erreiche die Katz uf de Tann.

Nix hats gebrung, die Katz is ned komm,  
ach was hannsen sich a do fer enni genommt?

8 Stunn später, jetzt warn all Dehäm,  
hotten awwer noch es selbe Probläm.

Nähschd verzweifelt, awwer endlich hottense Glick,  
de Vadder hat die Katz mem Körbche von de Tann gepflickt.

Wenn a die Katz von eich musst weiche,  
die Straußbuwe dun jetzt awwer fer eich kreische!

## **STRAUßBUWE**

Das wars jo noch ned ganz mit de Tiere,  
es is kaum zu glabe awwer a Hunde kann mer verliere!  
Grad gegenüber vom beschriebene Fall,  
hats deswe geb in de Ehe e Knall!

Die Fraue, ihr wissens, sie sin wie se sin,  
un schleppen de Freundin ihr Tiere mit sich nin.

So wars a dort, wie schon gesa,  
de Hund zum ufpassse Dehäm von de Freundin von de Fra.

Weil mer abber als Frau ned immer so kann,  
gebbt mer ne weiter an de genervte Mann.

Was wollt er dege mache, hat ne mitgenomm zum Kehre,  
„Warum dud dann der Hund ned uf mich here?“

Der Mann wollt mol gugge, awwer es war schon passiert,  
der Fremde is einfach allä de Bergweg nuff spaziert!“

Do isses dem Mann mol werr ganz bang,  
weil er gedenkt hat: „Hoffentlich is der Hund bevor mei Frau Häm  
kommt gefang!“

De Mann iss dann dem Hund no, awwer der wollt ned here,  
„Ei soll er sich doch zum Teufel schere!“

Es Schlimme war jo, der Hund hats gemacht,  
Dehäm war also vorprogrammiert de Ehekrach.

Die Frau kam Häm, de Hund war fert,  
ei do is geflo e manch beses Wert!

No lange, gemeinsame Stunne uf Suche,  
is ne dann komm, dass es nix bringt, wie se denne Hund rufe!

Der Hund is deshalb ab un fert,  
weil er ned verstann hat irgend e Wert!

Fer frieher denne Hund werre zu sich zu hole,  
hättense dran denke müsse, dass er is eigentlich Pole.  
Was fer e Glick, dass die Ehefrau a aus Pole stammt,  
die sprach war ihr deshalb fließend bekannt.

Wie es Aus gang is kenne ner eich jo denke,  
de Hund war gefunn, abber gedauert hats bis sich die Eheleut han  
kenne werre nette Blicke schenke.

Awwer von mir e Tipp, wenn mer uf e fremder Hund trifft,  
verschiedene Sprache spreche, bis er ufhert se klefft!

**MUSIK**

**STRAUßBUWE**

Die Geschichte sinn aus, es is soweit,  
mir widme uns unserm Strauß, em schänschde weit und breit.

Vergess is heit die Müh un die Zeit,  
er is erschaff un zur Taufe bereit.

In de Kärsch isses Wasser bei uns isses Wein,  
schä, wie de do hängsch so nei un so fein.  
Wenns rönt werrsche nass das macht dir nix aus,  
e Johr bleibsche hänge vor unserm Kerwe-Haus.

Dei Name is Strauß, wie solls a sonschd sinn,  
jetzt kipp ich zur Taufe de Wein in dich nin!

*Das Wasser gibt dem Ochsen Kraft  
dem Menschen Bier und Rebensaft  
drum danke Gott als guter Christ  
dass du kein Ochs geworden bist.*

**MUSIK**

**STRAUßBUWE**

Zum Schluss e liebes Dankens Wort,  
Fer mich wars heit die letscht Redd an dem Ort.

Fer klänes Geld in eirer Hand,  
de Bestseller ball im Nerremohrer Land.

Jetzt isses a an de rischdisch Zeit,  
dass mer uns mache fer es Spenderliedsche bereit.

Vielen Dank an de Yves fer es 50 Liter Fass Bier,  
un an de Sascha, sonsch wär unser Strauß jo ned hier!

Fer unser Kleidung a vielen Dank,  
bezahlt vom AUV un em Stefan Witt seiner Hand!

**SPENDERLIED der Straußbuwe**

Danke fers Zuhörn, ich hoff es hat eich e bissje gefall,  
Jetzt isses schon Zeit fer e kläner Ball.

Wie jedes Johr, es wäß jedes Kind,  
ihr Määd un ihr Buwe uff die Tanzfläch fer die drei Erschde, awwer  
bitte geschwind!

Auch wenn mer noch ewisch weiter mache kennde,  
es kommt jetzt noch ä Wort un das häßt: **ENDE**